



Republika e Kosovës – Republika Kosova  
Paneli Zgjedhor për Ankesa dhe Parashtrësia  
Izborni Panel za Žalbe i Predstavke

Anr.351/2021

**Paneli Zgjedhor për Ankesa dhe Parashtrësia (PZAP)**, në panelin e përbërë nga gjyqtarët: Adnan Konushevi kryesues, Rustem Thaçi dhe Faton Ademi anëtarë, me pjesëmarrjen e Zyrtarit të Lartë Ligjor Kudret Hasani, duke vendosur përkitazi me ankesën e Institutit Demokratik të Kosovës (KDI), me seli në Prishtinë, paraqitur kundër subjektit politik Nisma Social Demokrate, me seli në Prishtinë, për shkak të shkeljes së Kodit të Mirësjelljes për Subjektet Politike, përdorimit të gjuhës denigruese dhe nxitëse, gjatë fushatës zgjedhore, për Zgjedhjet e Parakohshme për Kuvendin e Republikës së Kosovës që do të mbahen më datë 14 shkurt 2021, në seancën e panelit të mbajtur më datë 11.02.2021 mori këtë:

## V E N D I M

**I. PRANOHET** e bazuar ankesa e Institutit Demokratik të Kosovës (KDI), me seli në Prishtinë, Anr.351/2021 e datës 08.02.2021 për shkak të shkeljes së Kodit të Mirësjelljes për Subjektet Politike, përdorimit të gjuhës denigruese dhe nxitëse, gjatë fushatës zgjedhore ndaj kandidatëve të subjekteve tjera politike, me qëllim të përfutimit elektoral, në fushatë zgjedhore, për zgjedhjet e parakohshme për Kuvendin e Kosovës, që do të mbahen me datë 14.02.2021, ndërsa subjektit politik Nisma Social Demokrate, me seli në Prishtinë i shqiptohet dënimi më gjobë në lartësi prej 20,000.00 (njëzet mijë) euro, për të cilën detyrohet ta paguaj në afat prej 15 (pesëmbëdhjetë) ditëve, nga dita e pranimit të këtij vendimi nën kërcënim të shqiptimit të dënimit shtesë.

**II. URDHËROHET** subjekti politik Nisma Social Demokrate, me seli në Prishtinë, që brenda afatit prej 24 orëve nga pranimi i këtij vendimi, ta përmirësoj shkeljen e përcaktuar si në pikën -I- të dispozitivit të këtij vendimi, në të kundërtën mund të sanksionohet me dënim shtesë nga PZAP-i.

## A r s y e t i m

Me datë 08.02.2021 PZAP-i, ka pranuar një ankesë nga Institutit Demokratik të Kosovës (KDI), me seli në Prishtinë, me të cilën pretendon se nga fillimi i fushatës zgjedhore në Kosovë me data të ndryshme është transmetuar në televizionet kombëtare një spot publicitar nga Nisma Socialdemokrate në të cilin spot është paraqitur gjuhë të urrejtjes për një kandidat për deputet nga një subjekt tjetër politik, veprime këto të cilat sipas parashtruesit të ankesës janë në kundërshtim me nenin 33 paragrafi 1 pika l, të Ligjit për Zgjedhjet e Përgjithshme dhe Rregullës Zgjedhore nr. 11/2013 neni 4 paragrafi 1 pika k). Parashtruesi i ankesës pretendon se me këto veprime përmes video spotit publicitar subjekti politik Nisma Socialdemokrate ka nxitur urrejtje për një kandidat duke e kualifikuar atë si antikombëtar

dhe person qe ka fyer viktimat e luftës se fundit me qëllim të denigrimit të imazhit të tij në këto zgjedhje. Andaj sipas parashtruesit të ankesës paraqitja e një spoti të tillë me gjuhë të urrejtjes duke përmendur edhe viktimat e luftës mund të ndikoj drejtpërdrejt në provokimin e dhunës kundrejt kandidatit për deputet, e ndërsa qëllimi i këtij ligji dhe kodit të mirësjelljes së subjekteve politike është krijimi i kushteve në të cilat populli i Kosovës mund të zgjedhë përfaqësuesit e tij përmes zgjedhjeve të lira, të drejta dhe të mirë informuara në një atmosferë të tolerancës demokratike, paqes dhe respektit për sundimin e ligjit. Andaj bazuar në atë që u theksua me sipër i njëjti konsideron se subjekti politik në fjalë ka bërë shkelje të dispozitave ligjore në fuqi dhe si dëshmi për pretendimet e tij, ankesës i ka bashkangjitur një CD.

Në përgjigjen në ankesë të datës 02.10.2019, subjekti politik Nisma Socialdemokrate thekson se sa i përket pretendimeve të parashtruesit të ankesës konstaton se me përgjegjësi të plotë se nuk e ka bërë emetimin edhe as nuk ka kërkuar emetimin e kësaj video ashtu siç pretendohen nga KDI, në asnjë televizion kombëtar, media online apo TV, tjera nuk ka kërkuar nga to një veprim të tillë të transmetimit të kësaj video. Te njëjtit theksojnë se kjo video e bashkangjitur si prove nga KDI-ja, nuk është transmetuar asnjëherë si spot elektorale në hapësirat reklamuese në mediat kombëtare nga ana e subjektit politik Nisma Social Demokrate. Ndërsa lidhur me pretendimet e ankuesit për shkeljen e nenit 33 të LZP-së, dhe të Rregullës Zgjedhore 11/2013 i njëjti në përgjigjen e saj theksojnë se subjekti politik Nisma Social demokrate nuk ka pasur e as qe ka për qëllim të nxisë tjetrin apo të provokoj dhunë ndaj dikujt sa i përket fushatës zgjedhore.

Paneli, pasi që shqyrtoj të gjitha shkresat e lëndës në kuptim të nenit 117 par. 2 të LZP-së, gjeti se:

#### **Ankesa është e bazuar**

Paneli, pas shikimit të bërë në CD-të, nga përmbajtja e të njëjtës pa mëdyshje vërtetohet se inqizimi është bërë në emër të subjektit politik NISMA, dhe kundër subjektit politik Partia Demokratike e Kosovës, respektivisht kandidatin për kryeministër nga ky subjekt Enver Hoxhaj.

Gjuha e përdorur në videon e dërguar si provë nga ankuesi është gjuhë linquese, denigruese dhe fyese, përmes së cilës haptas bëhet thirrje për mos votim të subjektit politik Partia Demokratike e Kosovës dhe kandidatit të saj Enver Hoxhaj, apo bojkotim të këtij subjekti, por njëkohësisht mesazhi i shprehur përmes kësaj gjuhe, cenon rëndë klimën demokratike të procesit zgjedhor gjatë fushatës zgjedhore dhe një linqim i tillë cenon edhe sigurinë e personit ndaj të cilit adresohet.

Legjislacioni aktual zgjedhor në mënyrë shprehimore ka ndaluar të bërit fushatë përmes gjuhës e cila nxit urrejtje ndaj të tjerëve nga cilado bazë, etnike, ideologjike, fetare, armiqësore etj. Tendencë për të shfaqur elemente patriotike duke sulmuar figura politike dhe duke aluduar në krahasimet e mendimeve të tyre shkencore me qëndrime të personaliteteve kontraverse, përveç që fare s'ka të bëjë me aspekt të fushatës zgjedhore, cenon rëndë klimën demokratike të garës elektorale, gjë që do të duhej të bëhej në suaza të garës programore.

Paneli, në kuptim të te lartcekurave nuk merret me vlerësime të qëndrimeve të personaliteteve të shprehura në aspekte shkencore, pasi kjo nuk bie në mandatin e tij të shqyrtimit, për arsye se ekzistojnë organe kompetente të cilat merren me vlerësime të gjuhës së shprehur shkencore qoftë në libra, televizione, radio apo forma tjera të të shprehurit në aspekt shkencor, mirëpo PZAP-i, në mandatin e tij sigurohet në garantimin e integriteti zgjedhor.

Përdorimi i një gjuhe të tillë është në kundërshtim me nenit 33 pika l), e LZP-së, me të cilën përcaktohet: *“Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: ... l) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve”*.

Përveç kësaj një veprim i tillë sanksionohet edhe me nenin 5 paragrafi 1 pika d) i Rregullës Zgjedhore Nr.13/2013, ku përcaktohet se *“subjektet e certifikuar politike aktivitetet e tyre zgjedhore duhet t’i bëjnë në pajtueshmëri me Rregullat zgjedhore të Komisionit Qendror Zgjedhor (KQZ)”*. Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.

Nga CD-ja, fotografitë e ofruara si provë dhe shkresat e tjera të lëndës, shihet qartë se nga ana e subjektit politik Nisma Social Demokrate, është shkelur dispozita e nenit 33 pika l), e LZP-së, e cila ndër të tjera përcakton se; *“Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjëres si në vijim: ... l) përdorimi i gjuhës, në formën e shkruar ose gojore, që nxit ose provokon, ose që mund të nxisë ose provokojë, një person tjetër për të kryer një akt të dhunës kundër personave tjerë ose pasurisë, ose e cila nxit apo mund të nxisë urrejtje kundrejt të tjerëve”*, për faktin se në video spotin publicitar të subjektit politik Nisma Social Demokrate theksohet se *“kandidati për kryeministër nga subjekti politik PDK, Enver Hoxhaj, e mohon se ka pasur gjenocid në Kosovë, ndërsa gjenocidin që e ka kryer Serbia e cilëson si përpjekje për gjenocid, ndërsa theksojnë se saktësimin e këtij pohimi mund ta vërtetojnë tek libri i Enver Hoxhaj, me titull Ndërtimi i shtetit politika e jashtme botimi 2017 faqe 198 dhe faqe 206, ndërsa në po të njëjtin video spot bëjnë thirrje që Enver Hoxhaj nuk e meriton votën e qytetarit pasi që kandidati në fjalë gjenocidin ndaj shqiptareve e konsideron si përpjekje për gjenocid”*.

Andaj sipas vlerësimit të Panelit, si dhe duke u nisur nga gjendja faktike, subjekti politik Nisma Socialdemokrate me këtë rast ka përdorur gjuhë e cila nxitë ose provokon akte të dhunës dhe e cila mund të ketë ndikim të tillë denigrues kundër kandidatit për deputet nga subjekti politik PDK Enver Hoxhaj, veprime këto që janë në kundërshtim me Kodin e Mirësjelljes të Subjekteve Politike.

Lidhur me përgjigjen e subjektit politik Nisma Social Demokrate, ku thekson se ky subjekt politik nuk e ka bërë emetimin dhe nuk ka autorizuar asnjë medium që të publikoj këtë spot publicitar, Paneli vlerësoi se me këtë përgjigje subjekti politik Nisma Socialdemokrate nuk e mohon se e ka realizuar një spot të tillë publicitar por se e njëjta thekson se për spotin në fjalë nuk e ka autorizuar asnjë medium kombëtar në TV, apo në mediumet online për emetimin e këtij.

Paneli, vlerëson se në rastin konkret nuk është relevante se ku është shfaqur apo publikuar videoja apo spoti në fjalë, por fakti se ky inqizim ka qenë i qasshëm për subjektin ankues dhe me asnjë provë të vetme nuk e ka mohuar faktin se spoti si i tillë ekziston.

Duke u nisur nga gjendja e konstatuar faktike, Paneli konstaton se nga provat e ofruara shihet qartë se nga ana e subjektit politik Nisma Social Demokrate, është shkelur dispozita e lartcekur e LZP-së, si dhe neni 5 paragrafi 1 pika d) i Rregullës Zgjedhore Nr.13/2013, ku parashihet se subjektet e certifikuara politike aktivitetet e tyre zgjedhore duhet t'i bëjnë në pajtueshmëri me Rregullat zgjedhore të Komisionit Qendror Zgjedhor (KQZ). Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalët, shkallën dhe peshën e shkeljes, pjesëmarrjen e subjekti politik në zgjedhjet e mëparshme që konsiston në faktin se subjekti politik Nisma Social Demokrate, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore si dhe shumën e fondeve që ka marrë subjekti politik prej Buxhetit të Republikës së Kosovës, për zhvillimin e aktiviteteve lidhur me fushatën zgjedhore. Po ashtu si rrethanë Paneli, mori edhe faktin që këtij subjekti, ia dha mundësinë për tu përgjigjur ashtu që në përgjigjet e tij e njëjta e ka mohuar shkeljen e tillë. Mos ndërmarrja e masave përmirësuese ka ndikuar në lartësinë e gjobës së shqiptuar si në dispozitiv të këtij vendimi .

Paneli, konform nenit 120.1 pika a) të LZP-së urdhëroi subjektin politik Nisma Social Demokrate, që të marrë masa dhe të përmirësoj shkeljet në afatin prej 24 orëve dhe nëse i njëjti nuk vepron sipas urdhrit të panelit do të sanksionohet me dënim shtesë nga PZAP-i , në pajtim me nenin 120.2 të LZP-së.

Paneli në kuptim të nenit 120.1, pika c), dhe nenit 118.1, të LZP-së, vendosi si në dispozitiv të këtij vendimi.

**Paneli Zgjedhor për Ankesa dhe Parashtrësia**  
Anr. 351/2021 më datën 11.02.2021

**Kryesues i Panelit**

Adnan Konushevi



**Këshillë Juridike:** Kundër këtij vendimi është e lejuar ankesa sipas nenit 118 par. 4 të LZP-së, në Gjykatën Supreme të Kosovës, brenda njëzetekatër (24) orëve nga momenti i marrjes-pranimi të këtij vendimi.